



28. januar 2009

Inatsisartut Forretningsorden-iani § 36 imm. 1 tunngavigalugu Naalakkersuisunut apeqquteqaatit makkua apeqquteqaatiginiarpakka:

Angajoqqaat pikkorissartinneqartalernissaasa aallartinnissaata kinguartoornera pillugu Naalakkersuisunut apeqquteqaatit

Angajoqqaat pikkorissartinneqartalernissaannut tunngatillugu Naalakkersuisunut apeqquteqaatinnut akissuteqaat 23. januar 2009 tigugakku tupaallassimavunga. Naatsumik oqaatigalugu Ilaqutareeqarnermut Peqqinnissamullu Naalakkersuisup akissutaasigut paasinarpoq angajoqqaat pikkorissartinneqartalernisaat sulii aallartinneqarsimanngitsoq.

Tamannalu naammaginangitsutut nalilertariaqarpoq. Inatsisartummi aalajangiunniukuvaat angajoqqaat pikkorissartinneqartalernissaat 1. januar 2009 aallartissasoq. Taamatut aalajangerneq pivoq 2006-imi Inatsisartut Ukiaanerani Ataatsimiinneranni.

Inatsisartut aalajangernerat imatut oqaasertalerneqarsimavoq:

Inatsisartut aalajangiuppaat Naalakkersuisut - Kalaallit-nunaanni kommunit suleqatigalugit

1. januar 2009 aallarnerfigalugu angajoqqaanngortussat angajoqqaat pikkorissartinneqartalernissaannut neqeroorfigisalerssaannik piareersaanissamik suliakkerneqassasut, tamakkualu tunngavigalugit angajoqqaat nakkaattoornissamut qanittumik inissisimasut pikkorissarnissanut taakkununga peqataasalernissaannik kaammattorneqassasut, taamaaliornikkut qitornartaassamik inuunermik aallartitsinissaannut tunniussaqaarnissamut piareersimanerulerniassammata

Inatsisartut siunnersuummik matuminnga aalajangiussaqaartut, tassa Naalakkersuisut sulisitsisui, paatsuugassaangitsumik aalajangiussaqaartut, tassa siunissami angajoqqaanngortussat qitornaminnik perorsaasinnaanissaannut piginnaaneqalernissaat siunertaralugu.

Ajornartorsiutit arlalissuit ukiuni kingullerni Demokraatinit uparuaavigineqartarsimasut ilarpassui siunnersuuttip piviusunngortinneqarneratigut qaangivigineqarnissaannut annertuumik iluaqutaasinnaagaluarpoq maannalu UNICEF-ip nunatsinnut tunngatillugit maalaaruteqarneratigut saqqummiunneqarput.

Allatut oqaatigalugu Naalakkersuisut Inatsisartunit aalajangiunneqarsimasut piviusunngortinnissaannut ukiunik marlunnik periarfissinneqarsimagaluarput. Naalakkersuisut Inatsisartunik suussupaginnillutik pissusilersornerat Naalakkersuisunut issiasunut nikanarsaataavoq. Tamannalumi aamma Naalakkersuisut tulleriaarinerlunnerannut takussutissaavoq. Siumup Atassutillu meeqqat atugaasigut siumut isigisumik pilersitsiniarlutik suliniuteqarnissaq soqutiginnigilaat.



Naalakkersuisut Inatsisartulluunniit aalajangigaannik malinninngitsut Demokraatinit naammagineqanngippata pissusissamisuuinnarpoq. Taamaattumik apeqquteqaatit makkua paatsoornerqarsinnaanngitsunik erseqqissunillu akineqarnissaat kissaatigaara:

1. Sunaana pissutigalugu angajoqaanngortussat pikkorissarneqarnissaannik suli neqeroorfigineqanngitsut? Matumani piffissaaleqinerup utoqqatsissutigineqarnissaa kissaatiginngilara. Naalakkersuisut 2006-ip ukiaaniilli piareersaateqarnissamut periarfissaqarsimagaluarput.
2. Inatsisartut ukiut marluk sinnerlugit matuma siornatigulli aalajangigaannik Naalakkersuisut piffissarititaasup iluani piviusunngortitsisimanninnerannut kina akisussaava?

Naalakkersuisut qinnuvigineqassapput ullut suliffiusussat qulit qaangiutinnginnerini apeqquteqaatit akissuteqarfigeqqullugit.